

Retschavì conturas politicas en la regiun

Cun strusch 28 onns surpiglia Philipp Wilhelm da Tavau il presidi da la Partida socialdemocratica

DAD ANDREAS CADONAU / ANR

■ **La Partida socialdemocratica dal chantun Grischun posseda a partir da l'entschatta d'avrigl 2016 in nov president. Philipp Wilhelm da Tavau remplazza Jon Pult e furma la nova direziun da la partida cun la vicepresidente Chatrina Josty.** Tutenina è el stà qua,

uschè svelt sco la stgala rullanta ha manà Philipp Wilhelm orasi da la staziun da Curia sin la Via da la Staziun, uschè svelt è el sa catapultà en la politica chantunala sco nov president da la Partida socialdemocratica. Philipp Wilhelm, cun ses bainglanti 28 onns, architect e manual da scrinari, era strusch enconuscent sur il cunfin da la partida e dal circol da Tavau. Uschebain ch'el ha ditg dad esser commember da la suprastanza da l'Uniuon grischuna dals locataris. «La tematica da l'abitar e da la purschida d'abitaziuns per in pretsch raschunavel ha interessà mai nà da mia professiun.» Wilhelm ha studegià architectura ed ha lavurà intgins onns a Turitgen in in biro d'architectura pli pitschen. L'architect è dentant turnà a Tavau nua ch'el e creschì si e nua che ses bab maina ina scrinaria. «Jau na sun betg creschì si en in ambient politic, la politica era sulet a l'ur in tema a la maisa cuschina en la chasa paterna a Monstein.» Sco mastergnant a Tavau è il bab commember da la Partida liberaldemocratica. Il giuven maturand vegn dentant tuttina politisà a Tavau. E quai en connex cun il Forum Economic Mundial e las discussiuns davart la globalisaziun e las discrepanzas tranter las terras ritgas e las terras povras. Da quel temp ha la musica



giugà ina gronda rolla en sia vita, Wilhelm era part dad ina band da punk a Tavau. «Da quella critica vers la pussanza e la globalisaziun è segiramain restada ina optica globala sin ils schabetgs actuals.» Accentuà l'engaschi politic ha Wilhelm en la discussiun publica a Tavau da l'onn 2009 en connex cun l'avertura dad in center per personas che tschertgan asil. Wilhelm e ses amis politics èn s'exprimids public envers la resistenza encunter quel center ed han pretendì engaschi a favur da las personas che tschertgan asil. «L'emprim avain nus simplamain gi in bocca largia.»

Fundà ina cuminanza d'interess

Wilhelm e ses cumpogns èn dentant s'engaschads. Cun fundar ina cuminanza d'interess che porscha sustegn d'integrar las personas estras. La cuminanza d'interess è sa sviluppada ad ina uniuon presidiada da Philipp Wilhelm cun blers commembers singuls, dentant era cun sustegn dad ulteriuras organizaziuns e cun la participaziun da las plaivs da Tavau. «Nossa lavur vegn oz renconuschida da tuttas varts.» Sa chapescha che l'engaschi politic dal giuven maturand e student ha purtà la discussiun politica a la maisa cuschina da la fami-

glia Wilhelm a Monstein. Las opiniuns dal giuven socialist n'èn betg adina s'accordadas cun il mund liberaldemocratic dal bab. «Quellas discussiuns han dentant gidà mai a formular mias ideas e da reponderar mia posiziun.» Da donn n'èn las discussiuns politicas a la maisa cuschina betg stadas. Oz lavura Wilhelm en piazza parziala da scrinari en il manaschi dal bab. El ha ditg d'avair gi avunda da lavurar onns ora sulet cun il chau ed haja tschertgà la lavur manuala. L'engaschi parzial en il manaschi dal bab lubescha da nizzegiar il spazi per in engaschi politic. Per exempel sco presi-

dent da la Partida socialdemocratica dal chantun Grischun. Il regl da muventar insatge haja intimà el da star a disposiziun per il presidi da la partida bainsavend ch'il Grischun saja in ambient spinus per la Partida socialdemocratica. Esperienza politica ha Wilhelm rimnà en il parlament da la vischnanca da Tavau. E là ha el stuì sa fatschentar cun la realitad da la politica da mintga di sco commember da la cumissiun da gestiun.

Posseda cleras imaginaziuns

Ma era pertutgant la politica chantunala da la Partida socialdemocratica posseda Wilhelm cleras imaginaziuns ed el ha menziunà la pretensiun politica da la partida en connex cun la politica da cultura. Il nov president è pertschert che l'ambient politic è sa mida e ch'il lavurer vota ozendi plitost per la pps enstagl per la ps. «Nus stuain formular meglier nosas pretensiuns.» Gist pertutgant l'immigraziun n'èsi magari betg simpel da metter pretensiuns d'integrasiun vers las pretensiuns da serrar il cunfin e trametter l'armada. Tuttina è il nov president da la Partida socialdemocratica persvadi ch'i dat paucas alternativas a l'integrasiun e che las experiencias fatgas en quel connex a Tavau pon vegnir exequidas en auters lieus. A la maisa cuschina a Monstein èsi puspè vegnì in pau pli quiet. Wilhelm è vegnì elegì president da la Partida socialdemocratica cun la finamira ch'el sa dediteschia al disput politic sin nivel chantunal. In zichel plaschair da l'engaschi politic dal figl regia probablmain er a la maisa cuschina a Tavau/Monstein.

Cun strusch 28 onns surpiglia Philipp Wilhelm il timun da la Partida socialdemocratica dal chantun Grischun. FOTO A. CADONAU